



ज्वजलपा वाःपौ

JWOJALAPA WEEKLY

दै ७ ल्या: ४२ (पूर्णडिक १४४) ने. सं. ११३७ तछलागा दुतिया आइतवा: २०७४ जेठ २८ गते आइतवार (Jun- 11, 2017)

मू ८।- पृष्ठ ६

राजपा सहभागी मजगु अवस्थाय् चुनाव छु जुइ ?



थ:पिन्सं हे भोट बिया त्याकाम्ह प्रधामन्त्री शेर बहादुर देउवालिसेया वार्ता असफल जुइवं मधेस केन्द्रीत दलतयगु एकीकृत पार्टी राष्ट्रिय जनता पार्टी माग पुरा मजगु अवस्थाय् निगूगु चरणया स्थानीय चुनावयात बहिस्कार यायेगु निर्णय या:गु दु। निगूगु चरणया स्थानीय निर्वाचन न्हय: माग पुरा याये फइमखु धका: प्रधानमन्त्री देउवां अडान कयादी धुनेवं वार्ता तर्क त्वा:दगु ख:सा आ: राजपा आन्दोलनय् वंगु ख:। संविधान संशोधन लगायतया मागयात सम्बोधन मया:गुलिं आन्दोलनय् वनेगु धका: राजपां निर्णय या:गु दुसा आ: चुनाव छु जुइ धका: सकलसिनं चासो तयाच्चंगु दु। जनसंख्याया आधारय् स्थानीइ तह निर्धारण यायेमा:गु संघीय गठबन्धनलिसे जगू सहमति कथं संविधान संशोधन यायेमा:गु, मधेस आन्दोलनया भूवलय् सीपिन्त सहिद घोषणा यायेमा:गु अबले त:गु मुद्दा लितकायेमा:गु लगायतया माग तथा आन्दोलन

यानाच्चंगु ख:। सरकारं माग पुरा याइला धका: आन्दोलन स्थगित याना देउवायात प्रधानमन्त्री दयेकूगु राजपा आ हाकनं सशक्त आन्दोलनय् वनेगु धका: निर्णय या:गु दु।

थ्व हे दथुइ राजपा प्रमुख प्रतिपक्ष दल एमाले विरुद्ध क्वहां वंगु खनेदत। शुक्रवा: सिराहया गोलबजार य् जगू चुनावी सभाय् सभा या:गु अवस्थाय् राजपाया नेता कार्यकर्तातयसं विरोध प्रदर्शन याना पंग: तर्क थनेगु या:गु ख:। विशेष याना संविधान संशोधन लगायत मधेसी आदिवासी जनजाति नापं उत्पीडित समुदायया माग पुरा यायेगु नितीं प्रमुख प्रतिपक्ष एमाले हे पंग: जुयाच्चंगु मधेसवासी दलतयगु ठहर दु। उकिं आ: चुनावीया तयारीया भूवलय् तराई लागाय् राजपाया नेता कार्यकर्तात एमालेप्रति आक्रमक जुइगु संभावना अप्पया व:गु दु। उखे सरकारं धा:सा गगु नं हालतय् चुनाव यायेगु कथंया तयारी या:गु दु।

किपू नगरपालिकाया जनप्रतिनिधिपिनिगु सम्पत्ति गबले सार्वजनिक जुइगु ख: ?

ज्वजलपा वा:पौ

किपू नगरपालिकाया न्हूपिं जनप्रतिनिधि वयेवं न्हापांगु बैठकं हे जनप्रतिनिधितयगु सम्पत्ति विवरण सार्वजनिक यायेगु धका: निर्णय या:गु ख:। न्हापांगु बोर्ड बैठकं किपू नगरपालिकाय् प्रशासनिक भाषाया रुपय् नेपालभाषायात नं मान्यता बिइगु धका: निर्णय या:गु ख:सा जनप्रतिनिधितयगु सम्पत्ति सार्वजनिक यायेगु धका: निर्णय या:गु ख:। नेपालभाषायात सरकारी कामकाजया भाषाया रुपय् छयलेगु नितीं नगरपालिकाय् जनतातयसं सेवा कायेगु भूवलय् भरे यायेगु फुक्क कथंया फारम नेपालभाषां भाय् हिलेगु ज्या नागरिक सम्वाद केन्द्र किपूपाखें यानाच्चंगु दु। मेयर रमेश महर्जनं उगु भाला नागरिक सम्वाद केन्द्रयात भाला बिउगु ख:सा आ: छुं दिंया दुने हे उगु कथंया भाय् हिउगु फारम ल:ल्हायेगु ज्या जुइत्यंगु दु।

जनप्रतिनिधिपिनिगु सम्पत्ति सार्वजनिक यायेगु धका: निर्णय या:गुलिं किपूमितयसं आ: जनप्रतिनिधित जनताप्रति जिम्मेवार जुइगु अले भ्रष्टाचार मजुइगु अवस्था ब्वलनी धका: आशा या:गु ख:। जनप्रतिनिधिया सम्पत्ति सार्वजनिक यायेगु ज्या धका: छगू कथं नमुनाया ज्याभूव: जुइ धका: तायेकूगु ख:। किपू नगरपालिकाया न्हूम्ह मेयर रमेश महर्जनं जनप्रतिनिधिया सम्पत्ति सार्वजनिक यायेगु ज्या जेठ महिनाया दुने जुइ धका: संचारक:मितलिसे खँल्हायेगु भूवलय् धयादीगु ख:। तर जेठ महिनाया अन्तिम ई थ्यंगु अवस्थाय् तक नं जनप्रतिनिधिया सम्पत्ति सार्वजनिक या:गु अवस्था मदुनि। उकिं किपू नगरवासीतयसं आ: जनप्रतिनिधितयगु सम्पत्ति गबले सार्वजनिक याइगु ख: धका: पियाच्चंगु अवस्था दु।

इनाप

ज्यापु समुदायया प्रतिस्थित व्यक्तित्वतयगु सफू पिकायगु नितीं क्वय् न्हयथनाकथंया विधाय् दुथ्या:पिं व्यक्तिपिसं थ:थ:गु बायोदाता (C.V) इलय् हे बियादीत इनाप यानाच्चना।

१. मन्त्री, २. सभासद ३. राजदूत, वाणिज्यदुत, कन्सुलर, ४. पि. एच. डि. डाक्टर ५. एम.बि.वि.एस डाक्टर, बि.ई नर्सिंग, डेन्टिस्ट, फर्मासेप्ट, ६. बि.ई. इन्जिनियर, ७. प्राध्यापक क) स्कूल (मास्टर डिग्री) ख) विश्वविद्यालय ग) चार्टर्ड एकाउन्टेन्ट, लेखा परिक्षक (मास्टर डिग्री) ९. न्यायाधीश सिनियर अधिवक्ता, १०. पाइलट, ११. सेकेण्ड क्लास अफिसर, नेपाल सरकार व वित्तिय संघ संस्थानया क) जि.एम. ख) सि.ई.ओ, ग) सेकेण्ड क्लास अफिसर, १२. फाइन आर्ट, १३. कलाकार, १४. खेलाडी १५. उच्चपदय् च्वना समाजसेवा, १६. उच्चपदय् च्वना: विभिन्न विधाय् ज्याय् धुंकीपिं

स्वापूया निती
नजरराम महर्जन
निखासी, न्हूबजा:, किपू-१०
फोन नं. ९८४९४०१०७७

भिन्तुना ! भिन्तुना !! भिन्तुना !!!



हर्ष महर्जन
वडा अध्यक्ष कीनपा १



हरिहरण महर्जन
नगर सदस्य कीनपा १०

ज्यापु महागुथि किपू नगरसमितिया आजीवन सदस्य भाजु हर्ष महर्जन वंगु बैशाख ३१ जुगु चुनावय् कीर्तिपुर नगरपालिका वडा नं.१ या वडाध्यक्ष व हरिहरण महर्जन की.न.पा. वडा नं.१० या सदस्य पदय् त्याकादीगुलिं वय्क:पिन्त यक्व यक्व भिन्तुना देख्नासं कार्यकाल सुथांलाय्मा धका: भिन्तुना देख्ना च्वना।

ज्यापु महागुथि किपू नगरसमिति
किपू



ज्वजलपा वा:पौ

सल्लाहकार
श्रीकृष्ण महर्जन
प्रकाशक:

नजरराम महर्जन
सम्पादक

श्रीकृष्ण तण्डुकार
ले-आउट:

ज्वजलपा डेस्कटप
संवाददाता

भरत महर्जन, निरजमान सिंह
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapawebly@gmail.com

सम्पादकिय

संविधान संशोधनया विपक्षय् स्थानीय निकायया जनप्रतिनिधित

संघीयताया भावना कथं प्रदेशपाखे जक राष्ट्रिय सभाय् प्रतिनिधित्व जुइमा:गु अले स्थानीय तह धइगु विकास निर्माणया आधार याना वनेमा: धका: मधेसी, आदिवासी जनजाति नापं पहिचानया आधारय् संघीयताया पक्षय् दुपिन्सं माग तथा वयाचवंगु ख: । अले व हे मागयात सम्बोधन यायेगु कथं हे संविधान संशोधनया प्रस्ताव न्हय:ने यकात:गु ख: ।

स्थानीय तहया न्हापांगु चरणया निर्वाचनपाखे निर्वाचित जुयावीपि ३ नम्बर प्रदेशया मेयर उपमेर व अध्यक्ष उपाध्यक्षतय्गु भेलां संविधान संशोधनया सवालया विपक्षय् दनेगु निर्णय या:गु दु । स्वन्हु तक जुया क्वाचा:गु भेलां नेपा:या संविधानया धार ८६ या उपधारा २ या खण्ड क कथं राष्ट्रिय सभाया निर्वाचन मण्डलय् नगरपालिकाया प्रमुख एवं उपप्रमुख गाउँपालिकाया अध्यक्ष व उपाध्यक्ष दइगु अवस्थायात संशोधन यायेगु प्रस्तावप्रति थ:पिनिगु गम्भीर ध्यानाकर्षण जूगु दु धका: न्हयथसे उगु प्रस्ताव संविधानया निर्दिष्ट या:गु संघ, प्रदेश व स्थानिय तहया दथुइया सहकार्यता, सहसासन व समन्वयया सिद्धान्त व संघीय लोकतन्त्रया सिद्धान्तया अ:ख: जुइगु ठहर या:गु दु ।

थुक्रिया अर्थ आ: संविधान संशोधनया प्रस्तावया विपक्षय् स्वयं ३ नम्बर प्रदेशया स्थानीय निकायया जनप्रतिनिधित न वनीगु जूगु दु । मेमेगु प्रदेशया जनप्रतिनिधितय्सं थुगु विषययात कया गज्ज:गु कथंया मत तइगु ख: आ: वया उक्रिया आधारय् संविधान संशोधनया सवालय् लिच्व: लाइगु अवस्था ब्वलनीगु जूगु दु ।

गजल शौरभ शाक्यया

गजल-३३



दुखय् न्हिलाब्यू, ऐ जिन्दगी
खबिया मू तयाब्यू, ऐ जिन्दगी ।
नुग:चकका उलाब्यू, ऐ जिन्दगी
थ:त जूगु धयाब्यू, ऐ जिन्दगी ।
ख:गु खँ सुइत कनाब्यू, ऐ जिन्दगी
मभिँया आगं प्वलाब्यू, ऐ जिन्दगी ।
सुर्दोथें जल्ल त्वयाब्यू, ऐ जिन्दगी
क्यवय् स्वाँ ह्वयाब्यू, ऐ जिन्दगी ।
देशया नितिं ज्या ख्यलाब्यू, ऐ जिन्दगी
समताया लँपु क्यनाब्यू, ऐ जिन्दगी ।

चुनावया लिच्व:यात गुगु कथं कायेगु ?



श्रीकृष्ण महर्जन

न्हूगु संविधान कथं न्हापांगु चरणया स्थानीय तहया चुनावया लिच्व: पिहां वयेवं चुनावया लिच्व:यात कया थ:थ:गु कथं व्याख्या विश्लेषण यानाचवंगु दु । न्हापांगु चरणया निर्वाचनयात स्वल धा:सा चुनावया लिच्व: छगू पक्ष ख:सा चुनावय् पहिचान पक्षधर धा:गु राजनीतिक पार्टीतय् व:गु मेगु महत्वपूर्ण पक्ष ख: ।

अथे हे चुनावय् त्या:पिं मनूत गज्ज:पिं ख: ? इमिगु बिगत गज्ज:गु अले इमिसं पहिचानया मुद्दायात गुगु कथं स्वयाचवंगु दु धइगु अझ महत्वया विषय ख: । उकिं चुनावय् छु पार्टी त्यात धका: जक स्वया विश्लेष याना वन धा:सा गलत जुइफु ।

स्थानीय तहया चुनावयात कया स्वयेकले चुनावया लिच्व: कथं दक्ले त:धंगु दलया रुपय् एमालेया उम्मेदवार त त्या:गु खने दु । २०५४ सालय् जूगु स्थानीय तहया निर्वाचनया तुलनाय् थुगुसी एमाले न्हापांगु चरणया स्थानीय तहया चुनावय् म्हो जक त्या:गु खने दु ।

न्हापा करिव ८० प्रतिशत स्थानीय निकाय कज्जा या:गु एमालें थुगुसी करिव ५५ प्रतिशत जक त्याकेत ता:ला:गु दु । अझ प्यंगू प्रदेशया लिच्व: वल धा:सा एमाले गुलि प्रतिशतय् थ्यनीगु ख: व धा:सा आ: थत्थें हे धाये थाकू । न्ह्यागुसां एमाले न्हापाया स्थानीय तहया चुनावया तुलनाय् थुगुसी धा:सा म्हो जक त्याकेत ता:ला:गु अवश्य नं ख: ।

एमालेया गुलिं गुलिं नेतातय्सं चुनावय् थ:पिनिगु पार्टी गुगु कथं त्यात व धइगु संविधान संशोधनया विपक्षय् जनमत दुगु पुष्टि जुल धका: तर्क तयेगु तर्क यानाह:गु दु । उगु ल्याखं स्वल धा:सा एमालें गन नं बहुमत जनताया मत कया त्याकूगु मदु एमाले बहुमतया आधारय् जक त्याकूगु ख: । एमाले बाहेकया मतयात छथाय् तयेगु ख:सा बहुमत एमालेया विपक्षय् मत खने दु । उकिं एमालेया नेतातय्सं संविधान संशोधनया विपक्षय् जनता दु धा:गु पाय्छि धायेफइगु अवस्था मदु ।

चुनावं गज्ज:गु लिच्व: वइ धइगु खँ चुनावय् मत कुर्का जनतां मत बिउगु आधारय् अर्थात जनता छु पक्षय् दु धका: स्व:गु आधारय् जक जुइ धका: तायेके मजिउ । चुनाव त्याकेगु नितिं राजनीतिक दलतय्सं गज्ज:गु मनूयात उम्मेदवार बिल ? चुनावया नितिं गुलि

थुगुसीया चुनावया लिच्व: खना पहिचानवादीत ग्यायेमा:गु अवस्था अवश्य नं मदु । अले पहिचानया नितिं निरन्तर रुपं क्रियाशिल जुया वन धा:सा अवश्य नं कन्हय् वना पहिचान पक्षधरतय्गु विजय जुइगु अवस्था वइतिनि धका: थुइकेमा: । आ: चुनावय् त्यानार्वीपपाखें नं पहिचानया पक्षय् गुलि फु उलि ज्या याकेगुपाखे स्वनिग:या आदिवासी नेवा:तय्सं बिचा: याना न्ह्या: वनेमा:गु अले पहिचानया आन्दोलन व अभियानयात निरन्तरता बिया च्वनेमा:गु आवश्यकता दु ।

ध्यवा खर्च यात ? चुनावया भ्बलय् मतपत्रनिसें चुनावी चिं अले मतगणना या:गु इलय् छु जुल धइगु खँपाखें नं प्रभाव लाइगु ख: ।

स्वनिगलय् जक हे धायेगु ख:सा कयौं थासय् मत कुतुवंगुसिबें अप्व: मत पिहां व:गु अले म्हो मत व:गु तर्क दु । अले गुलिं गुलिं थासय् ला मत ल्या:खा:गु मिले मजुल धका: विवाद जूगु नापं छुं छुं ईया नितिं मतगणना तर्क स्थगित जूगु तर्क दु । अझ भरतपुर महानगरपालिकाया सवालयात कया स्वल धा:सा ला मतगणनाय् विवाद जुया तनावपूर्ण अवस्था तर्क ब्वलंगु घटनां याना मतदान जक मखु मेमेगु पक्ष नं नतिजायात लिच्व: लाकाचवनी धका: थुइकेमा:गु अवस्था दु ।

थुगुसीया स्थानीय तहया चुनावय् संघीय समाजवादी व नयाँ शक्तिया उम्मेदवार मत्या:गु अले इमित भोट मव:गुलिं पहिचानया मुद्दा समाप्त जुल, नेवा: नापं आदिवासी जनजाति, उत्पीडित समुदाय पराजित जुल धका: तर्क विश्लेषण यानाह:गु दु । गुलिं गुलिं पहिचान पक्षधर नेवा: कार्यकर्तात ला निराश तर्क जूगु अवस्था खने दु ।

थुगुसीया चुनावय् संघीय समाजवादी पार्टी व नयाँ शक्तिया मत म्हो वल धायेवं इमि उम्मेदवारत पराजय जुल धायेवं पहिचानया मुद्दा पराजय जूगु अले आ: पहिचानया मुद्दायात ल्हवने हे फइमखुत धका: थुइके मजिउ । पहिचानया मुद्दायात स्वीकार मया:सां राजनीतिक दलतय्सं छु जाती समुदायया बाहुल्यता दु उगु समुदायया मनूयात हे प्रमुख पदय् थनेगु ज्या या:गु दु । अले उगु हे कथं निर्वाचनय् त्या:गु नं खने दु । (छगू निगू अपवादयात त्व:ता) उकिं एमालेनिसें राप्रपां तर्क स्पष्ट रुपं पहिचानया मुद्दायात अस्वीकार या:सां नं नेवा:तय्गु थासय् नेवा:त हे थनेमा: धका: चुनावय् प्रमुख पदय् थनेगु ज्या या:गु खने दु । स्थानीय रुपं थीथी राजनीतिक पार्टीइ क्रियाशिल जुयाचवंगु नेवा: नेतातय्सं हे गैर नेवा:तय्गु नं मत कायेमा: धका: उपप्रमुखय् नेवा: मखुपिन्त थनेगु ज्या या:गु खने दु । नेवा:त गैर नेवा:तय्गु मत मवइ धका: प्रमुख वा उपप्रमुखय् गैर नेवा:त थनेत तयार जुया चुनावय् ल्वात तर आदिवासी जनजातित अल्पमतय् ला:गु थासय् धा:सा खस आर्यया मनूत जक हे प्रमुख व उपप्रमुखय् उम्मेदवार बिइगु ज्या या:गु

खने दु । थुगु ल्याखं स्वल धा:सा पहिचानया मुद्दा ल्हवनीपिं नेवा: नापं आदिवासी जनजातित अले ब्यवहारय् जातीयताया दृष्टिकोणं स्वया वनीपिं खस आर्ययापिं ख: धका: थुगुसीया स्थानीय तहया न्हापांगु चरणया निर्वाचनपाखें बांलाक्क हे कयंगु दु ।

स्थानीय तहया निर्वाचनया भ्बलय् गुगु कथं नेवा: नापं आदिवासी जनजातितय्गु मत विभाजन जुल अले पहिचान पक्षधरपिन्त मत मवल धइगु खँ ख: व वास्तविकता मखु । उम्मेदवार जूपि: नेवा: नापं आदिवासी जनजाति हे जूगुलिं आदिवासी जनजातिया मत विभाजन जक जूगु ख: ।

पहिचानवादी कार्यकर्तातय्सं ला पहिचान पक्षधरयापिन्त हे तयेगु ज्या या:गु खने दुसा सर्वसाधारणतय्सं पहिचान पक्षधर व पहिचान विपक्ष धका: मकासे थ: लिक्क ला:म्ह, थ:ला:म्ह, भिंम्ह, समाजसेवी यानाचवंगु, चुनावय् त्याइम्ह, समाजय् लानाचवंगु प्रभाव नापं चुनाव चिंया आधारय् मतदान यायेत अ:पुम्ह मनूयात तर्क मतदान या:गु ख: ।

सर्वसाधारणतय्सं कस याना मतदान यात धा:सा मत स्यनी धका: प्यानल हे मत दयेगु ज्या नं या:गु खने दु । अले आ: व:गु मतया ल्याखं स्वल धा:सा एमाले त्या:गु धइगु पहिचानया विपक्षय् मतदान याना त्या:गु धका: थुइकेगु यात धा:सा गलत जुइफु । थौं स्थानीय तहया चुनावय् त्यानार्वीप एमालेया हे नेतातय्सं नं पहिचानया विपक्षय् दना ज्या यायेत अ:पुइगु अवस्था अवश्य नं मदु । वरु पहिचानया सवालयात स्थानीय स्तरपाखें भाषा, जाती, संस्कृति, ऐतिहासिकतायात प्राथमिकता बिया वनीगु अवस्था खने दु । उकिं थुगुसीया चुनावया लिच्व: खना पहिचानवादीत ग्यायेमा:गु अवस्था अवश्य नं मदु । अले पहिचानया नितिं निरन्तर रुपं क्रियाशिल जुया वन धा:सा अवश्य नं कन्हय् वना पहिचान पक्षधर तय्गु विजय जुइगु अवस्था वइतिनि धका: थुइकेमा: । आ: चुनावय् त्यानार्वीपपाखें नं पहिचानया पक्षय् गुलि फु उलि ज्या याकेगुपाखे स्वनिग:या आदिवासी नेवा:तय्सं बिचा: याना न्ह्या: वनेमा:गु अले पहिचानया आन्दोलन व अभियानयात निरन्तरता बिया च्वनेमा:गु आवश्यकता दु ।

(च्वमि किपूमि नापं नेवा: पत्रकार राष्ट्रिय दबूया केन्द्रीय नाय: नं ख:)

ज्येष्ठ नागरिक सेवा केन्द्र पाँगायात किपू नगरपालिका वडा ९या ज्याकू सभासद पाखें ग्वाहालि न्ह्याकेत मछिनाचन



ज्वजलपा वा:पौ /

कीर्तिपुर नगरपालिका वडा नं.८ पाँगा लाछी संचालन जुयाच्वंगु ज्येष्ठ नागरिक सेवा केन्द्र पाँगायात काठमाडौं जिल्ला क्षेत्र नं.१० या सांसद राजेन्द्र कुमार के.सी.पाखें आर्थिक ग्वाहालि या:गु दु । म्हिग: सनिवा: छगू ज्याभव:या दथुई ज्येष्ठ नागरिक सेवा केन्द्र संचालन याना वयाच्वंगु दे केयर सेन्टर लाछी नास: भवनय् भाया: छगू

लखया चेक ल:लहाना दीगु ख: । सांसद कोषपाखें सेवा केन्द्रय् वईपिं ज्येष्ठ नागरिक मिजपिं व मिसापिन्त काप: न्यानां लँ सुइका: फिकेत धका: उगु चेक ल:लहानादीगु ख: ।

वडा नं.८ या नवनिर्वाचित वडाध्यक्ष विनोद महर्जन नापं सहभागी दुगु उगु ज्याभवलय् केन्द्रया नायो दुर्गा महर्जन व न्चकु हरिदेवी महर्जनयात मंका: कथं ल:लहाना दीगु ख: ।

उगु ज्याभवलय् थ:गु नुग: खँ तयगु भूलय् सांसद के.सी. नास: भवनय् थाय् मगात, मेथाय् गनं जग्गा मिलय् जूसा छँ दनेत माक्व थ:म्हं ग्वाहालि यायेगु वचन बियादिल । नापं उगु धेवां ज्येष्ठ नागरिकपिन्त वस: सुइकेत मगात धा:सा हानं मेगु धेवा बिइगु नं वचन बियादिल ।

उगु चेक छगू लखया धा:सां सरकारी कर कटय् याना ९९ हजार जक दुगु खँ नायो दुर्गा महर्जनं कनादिल ।

वय्क:यात सुभाय् बिइगु भूवलय् नायो दुर्गा महर्जनं थ:पिन्सं निस्वार्थ भावं मांवापिनिगु सेवा यानाचवनागु ख: । थये सकसियागु ग्वाहालि याना: हे थ्व सेवा केन्द्र संचालन याये फयाच्वंगु ख: । थयेेहे सकसिया पाखें ग्वाहालि दइगु भलसा कयाचवना धयादिल । सांसद राजन के.सी.यात नेवा: परम्पराकथं गणेश: पुजा याना छ्यें सर्गं बिया लसकुस यानादीगु ख: ।

ज्वजलपा वा:पौ

वंगु वैशाख ३१ गते चुनाव जुया नगरप्रमुख, उपप्रमुख नापं भिगू वडाया वडाध्यक्षपिं त्यानावल । शपथ ग्रहण लिपा थ:थ:गु वडाय् वनां पदभार ग्रहण यात । पदभार ग्रहण लिपा ज्यायायेत ज्याकूला दु तर थाय् मदु ।

किपूया तग:वपीच्वंगु जनपोलिक्लिनिक संचालन यानाच्वंगु थायया क्वय् छकू क्वथाय् वडा नं. ९या ज्याकू संचालन यानाच्वंगु ख: । न्हापा छम्ह सचिव, निम्ह सामाजिक परिचालकपिं चवना ज्यायाइवलय् उलि थाय् मगा: मचा: महसुस मजगू ख: ।

आ: सिंहदरवारया अधिकार स्थानीय तहलय् वल धका: वय् वय् जुयाच्वंगु दु । ज्या धा:सा न्हापा गथे अथे हे तिनि । अथे ख:सा नं आ: वडाध्यक्षयात छकू क्वथा व सचिवयात छकू क्वथा माल । थये क्वथामा:वलय्



सेवाग्राही व सामाजिक परिचालकत फय्तुइगु थाय् हे मदु । छुं कथंया सहलह यायेत तकनं थाकुया च्वंगु खँ वडा नं. ९ या वडाध्यक्ष गंगाराम महर्जनं कनादिल । वय्क:या

धापूकथं जनपोलिक्लिनिकया थ:गु हे भवन टाउनप्लानिंगय् तयार दु । अन यंकूसा व छँ छखा दइवलय् ज्याकू चलय् यायेत गा: । जनपोलिक्लिनिकया सम्बन्धित मनुतलिसें न्यनेकने यानावलय् टाउनप्लानिंगया

ज्याकुथिइ निर्वाचन आयोग कयात:गु दु । अन भतिचा बांलाके मानिगु खँ कनादिल । याकनं हे अन मा:गु सुधार याना सरय् जुइगु जुइ धयादिल ।

न्त्यागु चीजय् नं ह्यूपा: वइवलय् छुं छुं मगा: कमछिला जु हे जुइ । अय्सां थ:थवय् सहलह याना समस्या समाधान यायेगु स्वये मा: । जनपोलिक्लिनिक नं सामुदायिक सेवा हे ख: ।

रामभक्त महर्जनया स्वंगूगु डिभिडी म्येचा: कुलिचिने पितव्वज्या नापं स्वम्हेसित हनेज्या



ज्वजलपा वा:पौ /

किपूया नांदमह म्येच्वमि रामभक्त महर्जन 'रमभक्त'या स्वक्व:गु नेवा:म्ये DVD म्येचा म्हिग: शनिवार छगू ज्याभव:या दथुइ पितव्वज्या जुल ।

ज्यापु महागुथि किपू नगरसमितिया ग्वसालय् किपूया मङ्गल माध्यमिक विद्यालयया हलय् जुगु चिखिफ्यने ज्याभवलय् पिकाक मिलन स्टुडियोया मिलन महर्जनया सभानायोसुइ जूगु उगु ज्याभव:या मूपाहाँ ज्यापु महागुथिया केन्द्रिय नायो नापं लोककवि राजभाई जक:मि ख: ।

मेपिं पाहाँपिं की.न.पा.वडा नं.१०या नवनिर्वाचित वडाध्यक्ष अमन महर्जन, निर्देशक पवन जोशी, ज्यापु महागुथि किपू नगर



समितिया नायो नजरराम महर्जन, सम्मानित जुयादीपिं जनकवि दुर्गालाल श्रेष्ठ, संगितक:मि गुज्ये मालाकार व च्वमि रामभक्त महर्जनपिं आशन ग्रहण यानादीगु ख: ।

ज्यापु महागुथि किपू नगरसमितिया नायो नजरराम महर्जनं लसकुस न्वचु विया: न्ह्याकूगु उगु ज्याभवलय् जनकवि दुर्गालाल श्रेष्ठ, संगितक:मि गुज्ये मालाकार व च्वमि रामभक्त महर्जनयात नं मूपाहाँ राजभाई जक:मि हंगु ख: ।

हने ज्याभव: धुंका: पाहाँपिं सकलसिनं मंका: कथं म्येचाया विमोचन यानादीगु ख: । विमोचन धुंका: म्येचा पिथनेत ग्वाहालि यानादीपिं कलाकार, संगितक:मिपिं व प्याखंम्ह:पिं सकसित नं हनापौ नापं विमोचित म्येचा छचा: छचा: नं इनेगु ज्या जुल ।

पाहाँ कीर्तिपुर नगरपालिका वडा नं.१० या वडाध्यक्ष अमन महर्जनं थौकन्हे भी नेवा:तसें नेवा:भाय् ल्हायेगु त्व:ता वनांच्वंगु इलय् रामभक्त महर्जनं नेवा: म्येचा पिथना नेपालभाषाया संगित लागाय् त:धंगु योगदान यानादीगु खँ न्हयथसें भीगु भाषा, साहित्य संगितया विकास यायेगु निंति त:धंगु योगदान यानादीगु खँ न्हयथनादिल ।

उगु ज्याभवलय् सम्मानित जुयादीमह जनकवि दुर्गालाल श्रेष्ठ थ:गु नुग:खँ तयेगु भूवलय् थुगु कथंया सम्मानं थ: तसकं लय्ता:गु खँ कनादिल ।

मूपाहाँ ज्यापु महागुथिया नाय: नापं लोककवि राजभाई जक:मि म्येचालय् दुथ्या:गु म्येया समिक्षा यानादिल ।

किपुली सापारु ग्वसा: खल: ११३७ नीस्वन

ज्वजलपा वा:पौ /

दय्दसं गुला पारु सापारु खुन्हु सापारु न्याय्केत किपुली दय् छगू छगू त्वाल पा:कया न्याय्का: वयाच्वंगु ख: । थुगुसीया सापारु तुंभ्व: त्वा:या पा: ख: । थुगु ग्वसाखलकय् तुंभ्वो, सिंदुवा:, मानर ख्या:, थतुभ्वो, कुसिचा, दोक क्यव, अमलिस, जिफाग: व चिलंच्वया सकलें म्हिग: सनिवा: जेठ २७ गते त्वा:या मुँज्या चवना ग्वसा खल: नीस्वन ।

गुकिया कजि अमरकाजी श्रेष्ठ, ल्यूकजि प्रमोद महर्जन, छ्याञ्जे विरेन्द्र शाक्य 'विविशा' ल्यू छ्याञ्जे केशरत्न वज्राचार्य, दांभरि प्रकाश महर्जन, ल्यूदांभरि नानीमैया रञ्जितकार, अथेहे दुज:पिं दीपज्योति वज्राचार्य, कर्ण श्रेष्ठ, राम महर्जन, कीरण कुमार वज्राचार्य, महेश कुमार श्रेष्ठ, चिरीमैया महर्जन, यसोदा श्रेष्ठपिं चवनादीगु दु ।

अथेहे ज्याभव: ता:लाकेया निंति थी थी उपसमितित नं नीस्वंगु दु । स्वयंसेवक परिचालन, खाद्यान्न व्यवस्थापन, वाद्यवादन, प्याखं, अनुगमन, आर्थिक, ख्याल: (प्रहसन) स्वास्थ्य ख: ।

थुगु सापारु तुंभ्वो त्वा:या धिमे खल:या कजि दिववहादुर महर्न (हुकु) मदुगुलिं वयक:या छैय्त्नं थाचिना छवइगु जूगु दु ।



किपुलिइ सापारुया भूवलय् पिथनीगु मौलिक कथंया प्याखं धेधेपापाया छगू लू । गुगु प्याखं किपूया ऐतिहासिक घटना नाप स्वांनाच्वंगु छगू कथंया संस्कृति ख: ।

बज्रयानया ऐतिहासिक पृष्ठभूमि



पुर्ण ताम्राकार

विश्व न्यंक शान्तिया जः ह्वःम्ह विश्व शान्ति नायक गौतम बुद्धया जन्मस्थल नेपाः खः । नेपाःया लुम्बिनी खः । आदि कालं निसैं नेपाःमि हनावइच्चंगु छगू मूल धर्म बुद्ध धर्म खः । बुद्ध धर्मया मूलत निगू यान दु (हिनयान व महायान । नेपालय् थ्व निगूलि मत उलि हे मानय् याः । महायानया हे छगू कचा बज्रयान खः । बज्रयान धयागु छु गथे गुबले व गुकथं उदय जुल धयागु बारे दुं उलेगु कुतः याये ।

सिद्धार्थ गौतम बुद्धया जीवनकाल तक्क बुद्ध धर्मया विषयलय् छुं नं ग्रन्थ मदु । गौतम बुद्ध ८० दँया उमेरय् ई.पू. ४८३ बैशाख पुन्ही मंगलवार कुन्हु कृशिनगरय् महापरि निर्वाण जुल । महामानव गौतम बुद्धया परिनिर्वाणजुया स्वला लिपा बुद्ध धर्मयात स्थायित्व बीया नितिं जुजु अजातशत्रुया संरक्षणय् भिक्षु महाकाश्यपया अध्यक्षताय् अधिवेशन जुल । थ्व अधिवेशनय् ५०० म्ह भिक्षुपित्सं ब्वति काःगु खः । थ्व सम्मेलनय् उपालि भिक्षुं बुद्ध दयेका बिज्यागु भिक्षु संघया नियमत न्ह्यब्वल । अथेहे बुद्धनाप २५ दँ तक्क नापच्चना जीवन हंम्ह भिक्षु आनन्द महामानव बुद्धया उपदेश छसिकथं न्ह्यब्वल । उगु सम्मेलनय् थ्वपिं निगू बाहेक, बौद्ध ग्रन्थया रचनाया बारे सः तक्कं पिमदं । बुद्ध परिनिर्वाण जुया करीव १०० दँ लिपा भिक्षुपिनिगु विचारे मतभेद खनेदत । छथ्व भिक्षुपिं परिवर्तनवादी खने दत धाःसा, मेगु पुचःया भिक्षुपिं परम्परावादी खनेदत । विशेषयाना पूर्वपाखे वैशालिया भिक्षुपित्सं बुद्ध दयेका थका बिज्यागु छुं छुं चिचिधंगु नियमय् हिलासु हयेमाःगु वाःचायेकल । थये याना बुद्धया उपदेश कथं फच्छि अप्वः प्रचार प्रसार यायेगु व सर्वसाधारणं नं भिक्षु जीवन हने फइकथंया भिक्षु संघया नियमय् हिलासु हये माःगु खँ न्ह्यब्वल । छथ्वः भिक्षुपिनिगु थ्व विचाः प्रति मेगु भिक्षु पुचलं सहमति मव्यूसेलिं भिक्षु संघ स्थविरवाद (हिनयान) व महासंघिकय् कुचा दल । महासंघिक लिपा वना महायान समुदायया विकास जुल ।

महायानया विकास क्रमय् इसाया न्यागू शताब्दीया अन्तपाखे मन्त्रयानया उदय जुल । छुं शब्दया उच्चारणं वा खँग्वः ब्वना मनंतुनागु ज्या पूर्ण सिद्धि जुइगु यात हे मन्त्रयान कथं कायेगु याः । मन्त्रया अवधारणा तसकं पुलां । बौद्ध धर्मया प्रामाणिक

ग्रन्थ त्रिपिटकय् नं मन्त्रया बारे गनं गनं न्ह्यथनातःगु । थेरवाद कथं नं बौद्ध परित्राण पाठयात धाःसा मानव दुःख व संकटया अन्त जुइ धयागु विश्वास दु । थ्व हे अवधारणा महायानय् मन्त्रयानया उदय जूगु खनेदु । मन्त्रयान कथं थ्व जगतय् भीगु मिखां खनेदुपिं व खने मदुपिं अदृश्य शक्ति नं यक्व दु । अयागु अदृश्य शक्तियात थःगु ल्हातय् कया मानव दुःख कष्टया अन्त यायेया नितिं मन्त्रया उच्चारण यायेगु याइ । अदृष्य शक्तिं भूत(प्रेतं) याइगु बिघ्न बाधा न्हंकेत मन्त्र ब्वनेगु याइगु नं उकिं हे खः । थ्व मतयात अप्वःसियां विश्वास याना हलिसे मन्त्रयानया विकास जुजुं वन । मन्त्र हे दक्व खँ याये फइगु व अझ बुद्धत्व प्राप्ति नं मन्त्रं जुइफइगु विचारं थाय् काकां वन । थ्व हे क्रमय् मन्त्रयानया महत्व व भूमिकाया बारे कया मन्त्रयान ग्रन्थ “महावैरोचन सूत्र” सूत्रया रचना जुल । अथेसां मन्त्रयान ताः ई तक्क न्ह्याये मफुत । थ्व मत उदयजुया सच्छि दँ लिपा हे थ्वकिया स्वरूपय् हिलासु वया तन्त्रयानय् हिल । थ्वकिं याना मन्त्रयानया स्वतन्त्र अस्तित्वया अन्त्य जुल । थुकथं इशाया स्वंगूगु शताब्दीपाखे तन्त्रयानया उदय जुल । तन्त्रयानयात मन्त्रयानया विकसित रुप कथं कायेगु याःगु उकिं हे खः ।

मन्त्र मब्वंसे थीथी शारिरीक मुद्रा व हावभाव याना अदृश्य शक्तितय् ल्हातय् कया दक्व बिघ्ना बाधा न्हंकेगुयात तन्त्रयान धायेगु याः । “गुप्त्य समाज तन्त्र” मन्त्रयानया मू ग्रन्थ खः । थ्व ग्रन्थ इ.सं.५०० पाखे रचना जूगु खनेदु । तन्त्रयानया थ्व मू ग्रन्थयात “तथागत गुप्त्यक” नं धायेगु याः । थ्व यानय् थी थी क्रियाकलापया नापं बौद्ध दर्शन नं दुथ्याः । थ्व यानकथं बुद्धत्व प्राप्तिया मू लँपु योग (ध्यान) खःसा शुन्यवाद मू दर्शन खः । उकथं तान्त्रिक ज्या(खँ, योग(साधना व शुन्यवादया समिश्रण हे तन्त्रयान खः । तन्त्रयानया शक्ति साधना स्वरूप मन्द व पंचमकार नाप स्वानाच्वंगु दु । पंचमकारया अर्थ ला, न्या, थी थी मुद्राया हावभाव, मद्यपान व संभोगक्रिया खः । थ्व धयागु महामानव गौतम बुद्धया नैतिक उपदेश व नैतिक आचरणया ठीक अखःगु अवधारणा खः । उकिं हे तन्त्रयानयात बुद्ध धर्मया विकृत स्वरूप कथं कायेगु याः । तर त्रिपिटकय् “आटानाटिय सूत्र”य तन्त्रयाननाप स्वाःगु खँ न्ह्यथनातःगुलिं थ्व बुद्ध धर्मया विकृत रुप कथं काये मज्यू धाईपिं नं दु । मेखे तन्त्रयानाय् आस्था तइपिनि कथं पंचमकर कथं प्रयोग जुइगु वस्तु व क्रिया शक्ति साधनाया प्रतिकात्मक वस्तुकथं जक छेलिगु खः । थ्व खँ बौद्ध व हिन्दु धर्मया साहित्यया पंच मकारया अर्थ थी थी कथं छेलातःगुलिं नं स्पष्ट याः । तन्त्रयानय् निगू सम्प्रदाय दु

(दक्षिणा चरित्र व वामाचारिण सम्प्रदाय । दक्षिणाचारिण सम्प्रदाय भार तया आसाम व बंगाल प्रान्तं विकसित जूगु खः । थ्व सम्प्रदायया मू विशेषता पुरुष प्रधानता खः, थ्वकिं हे थ्व सम्प्रदाय आधारित खः । दक्षिणचारिण सम्प्रदाययात हिन्दु धर्मय् “शिव” कथं मानय् याइ । दक्षिणचारिणया विपरित वामोचारिणया मू विशेषता स्त्री प्रधानता खः, थ्वकिं हे वामाचारिण सम्प्रदाय आधारित खः । थ्व सम्प्रदाय दक्षिण भारतय् उदय जूगु विश्वास दु । थ्व सम्प्रदायलय् स्त्रि जातियात ‘शक्ति’ कथं मानय् याइ । हिन्दू धर्मय् स्त्रियात “पार्वति” कथं मानय् याइ । उकिं हिन्दू धर्मय् कालि, दुर्गायात शक्तिरूपी देवी कथं मानय् याइ । इशाया च्यागूगु शदीपाखे बज्रयात अप्वः महत्व बीगु वामाचारित तन्त्रयान सम्प्रदाय कालान्तरय् बज्रयानय् हिल । उकथं च्यागूगु शताब्दीपाखे दक्षिण भारतया धान्यपटकया श्री पर्वते बज्रयानया प्रारम्भ जुल । थ्वयां लिपा तन्त्रयानया स्वतन्त्र अस्तित्व मदया वन ।

वास्तवय् बज्रयानया प्रारम्भ महायान सम्प्रदायया मन्त्रयान नापं जूगु खः । इसाया च्यागूगु शदी वया बज्रयानं पूर्ण रुप काःगु खनेदु । बज्रया अर्थ कठोर दृढता खः । सत्यया प्रतिक कथं बज्रयात काल । बज्र हे महासत्य व शुन्य खः धयागु अवधारणां थाय् काकां वन । थ्व खँ बालाक थुइकेगु गुण वा शक्ति दुम्हेसित हे बज्रसत्व धायेगु यात । बज्रयानया प्रमुख प्रवर्तक नागार्जुन (द्वितीय) खः धकाः स्वीकार यानाच्वंगु दु । नागार्जुन दक्षिण भार तया च्यागूगु शदीपाखे बौद्ध महाविहार या आचार्य खः । थुबले “बुद्ध हे जगत खः, जगत हे बुद्ध खः” धायेगु अवधारणां न्याम्ह ध्यानी बुद्धया उदय जूगु खनेदु । नागार्जुन दक्षिण भार तया च्यागूगु शदीपाखे बौद्ध महाविहार या आचार्य खः । थुबले “बुद्ध हे जगत खः, जगत हे बुद्ध खः” धायेगु अवधारणां न्याम्ह ध्यानी बुद्धय् वैरोचन (लः), अक्षयेश्य (आकाश) रत्नसंभव (पृथ्वी), अभिताभ (मी) व अमोघसिद्धि (फय्) खः उकथं प्रत्येक वस्तुया तत्वं छम्ह छम्ह ध्यानी बुद्ध कथं तन्त्रयानया योगं (ध्यानं) न्याम्ह ध्यानी बुद्धया उदय जुल ।

बज्रयानया विकासं उदय जूगु सहजयानं “सिद्धिमत्”या प्रादुर्भाव जुल । सिद्धि प्राप्तिया निति चित्त शुद्ध व निर्मल याना याइगु साधनायात सिद्ध धाइ । अले ज्ञां प्राप्त यायेत साधना याईपिं मनूतय्त हे सिद्ध धाइ । सिद्धतय्गु धापू कथं सहजभावं च्वनेगु हे मानव सुखया स्रोत खः, सुख नं ला स्वर्गय् दु, न ला पातालय् दु, सुखला थ्व हे संसार दु धयागु धारणा सिद्धतय् विश्वास दु । बौद्ध विद्वान राहुल सांकृत्यायनं तिब्बति साहित्यया लिधंसाय् ८४ सिद्ध दुगु खँ कना वंगु दु । थ्व ८४ सिद्धत

सन ७५० निसैं ११७५ या दुने उदय जूपिं धयागु धापु दु । थ्व ८४ सिद्धत मध्ये संभवत दकले न्हापांम्ह सिद्ध “सर हपा” खः । सरहपा जुजु धर्मपाल (सन् ७७०-८१५) या समकालिन खः । सर हपा धुंका शवरपा, लूहिपा, लिलापा, जोगीपा, दारिकपा, पदमबज्र, अनुङ्गवज्र, डोम्भिपा, येकर्पा, चेलूकपा, लूचिकपा, पुतुलिपा, आदिपिं सिद्धतय्त प्रमुख सिद्ध कथं कायेगु याः । उबलेया समाज, सिद्धतय्गु विचारं तसकं प्रभावित जुगुलिं उगु ईयात “सिद्ध युग” नं धायेगु या । उबले नेपाः, तिब्बत व भारतया उदिसाया नापं दक्षिण भार तय् नं ८४ सिद्ध परम्परां तसकं प्रभावित जुयाच्वंगु खः । दक्व सिद्धत सहजयानया समर्थक व प्रचारक खः । बज्रयानयात लोकप्रिय याना बुद्ध धर्मया विकास व संरक्षण यायेगुलि सिद्धतय्गु तःधंगु भूमिका दु ।

बौद्ध सिद्धमत च्यागूगु शदीनिसैं इसाया भिंछगू सदिया अन्ततक्क उन्नति जुयावंगु खनेदु । अफला धर्मपाल (इ..सं. ७७०-८१५) या शासनकाल सिद्धतय्गु विकास युग धासां ज्यू । सर हपाया शिष्य शरवपा खः । शवरपाया शिष्य लूहिपा जुजु धर्मपालया सचिव जुगुलिं वाल शासनकालय् सिद्ध मतया तसकं विकास जूगु खः । लूहिपा छम्ह प्रसिद्ध तान्त्रिक खः । लूहिपां तान्त्रिक सम्बन्धी यक्व लेख रचना यायेया नापं उडिसाया जुजु व मन्त्रियात नं भिक्षु याना ब्यूगु खः । पालवंश जुजुपित्सं नालान्दा महाविहार न्ह्याकातयेत ग्वाहालि याना च्वनेया नापं विक्रमशिल महाविहार नं नी स्वना बुद्ध धर्मया विकास व उन्नति यायेत दुर्ग्यंगु योगदान याना वंगु खः । सिद्धमतया आचार्यपिं सरहपा, नागार्जुन, मैत्रिगुप्त, विरुपा थें याःपिं आचार्यत नालान्दा महाविहारया आचार्यपिं खः । विक्रमशिल महाविहारला नालान्दा महाविहार स्वया च्वय ला । विक्रमशिल महाविहार बौद्ध शिक्षा, उपदेश बीया नापं बुद्ध धर्मया प्रचार प्रसार नं यायेगु याः । थपिं महाविहार वना नेपाःया बौद्धमार्गित ब्वनेगु व बौद्ध आचार्यतय्सं ब्वंक वनेगु यानाच्वंगु खः । इसाया १२ शदीपाखे बाख्तियार शाख्तियार खिलजीया नेतृत्वय् जूगु मुस्लिमतय्गु आक्रमणं भारतया नालान्दा, ओदन्तपुरि, विक्रमशिल थें याःगु तःधंगु बौद्ध महाविहार ध्वस्त जुल, बौद्ध धर्मया केन्द्रस्थल विनास जुल । मुस्लिमतय्गु आक्रमणं बचय् जुइत उगु महाविहार या बौद्ध आचार्य व भिक्षुपिं मध्ये गुम्ह नेपालय् बिस्यु वल, गुम्ह तिब्बतय् वन । अथे नेपालय् बिस्युवःपिं मध्ये विक्रमशिल महाविहारया प्रमुख आचार्य शाक्य श्री भद्र (इ.सं.११२७-१२२५) व तसकं नां दंम्ह बौद्ध विद्वान आचार्य रत्नकीर्तिया नां न्ह्यथने बहःजू । भार तया बौद्ध महाविहारं थी थी बौद्ध विद्वान आचार्य व मेपिं भिक्षुपिं नेपालय् दुहाँवःगुलिं याना नेपालय् विशेष याना स्वनिगः दुने बज्रयान धका तसकं विकास

जुल । उबले बज्रयान धर्मनाप सम्बन्धित यक्व ग्रन्थत रचना जुल । अथेला जुजु अंशुवर्माया सम्बत ५३६ (ई.६१४) या गोकर्णय च्वंगु चैत्यया अभिलेखय् “बज्रयान” खंग्व उल्लेख जुयाच्वंगुलिं थनिं १४०० दँ न्ह्यो हे नेपाः गालय् “बज्रयान” बुद्ध धर्म प्रारम्भ जुइ धुंक्गु खने दु । तिब्बतय् बौद्ध धर्म प्रचारया निति नालान्दा महाविहार या प्रसिद्ध आचार्य शान्तरक्षितं (ई.६५४-७७०) यात नेपाःया लँपु जुया तिब्बत छवःगु खः ।

तिब्बत वनेगु क्रमय् पदम संभव स्वनिगःया स्वयम्भू, चखुति वरवति, फर्पिङ्ग व सांखुया बज्रयोगिनिसं धर्मदशेना व शास्त्रार्थ यानावंगुया वर्णन बौद्ध ग्रन्थ व वयागु बायोगाफी च्वयातःगुलि थौं स्वया करीव १४०० दँ न्ह्यो हे बज्रयान धर्म प्रचार प्रसार जूगु खनेदु । थ्व ई जःखः वा छुं भञ्जालिपा बज्रयानया प्यंग थां कथं नालातःपिं क्वाथबहाःया वाकवज्र वज्राचार्य, तःक्षवहाया सुरतवज्र वज्राचार्य, सिंखमवहाःया लिलावज्र वज्राचार्य व मुसंबहाया मञ्जुवज्र वज्राचार्य (जामन गुभाजुपिं उदय जूगु अनुमान दु । जामन गुभाजुया कीर्तिकथं १) वज्र भैरव साधन नाम २) तारादेवी स्त्रोत एकविंशतिं साधन ३) महाभुद्राभिगिति याना स्वंगु ग्रन्थ खनेदु सा चर्याम्ये नमामि व श्री हारति (भैरवि राग गिहला ताल) व पूर्व दिगस्थित निपु खनेदु । धयागु गिहला भाजु मदनसेन वज्राचार्यया धापुतिं (पलेस्वां वर्ष १० अंक १५) बज्रयानया प्यम्ह आचार्यपनिगु बाखं किंवदन्ति मखुसे यथार्थ सत्य खः धका प्रमाणित याना ब्यू । उबलेनिसैं थौतक्क नं बज्रयान धर्म प्रचार प्रसार जुया विकास जुजुं वनाच्वंगु दु । धात्थेला स्वनिगःया बौद्धमार्गितय् नितिं सामाजिक कर्मकाण्ड व संस्कारया मू स्रोत व आधार हे बज्रयान जुयाच्वंगु दु । नेपालय् थथे बज्रयान धर्मयात थौ तक्कं धिसिलाक्क म्वाका तयेगुलि बज्राचार्यपनिगु विशेष योगदान दु । नेपाःया बुद्ध धर्मया इतिहासय् जयस्थिति मल्लया पालय् व राणा शासनकालय् बुद्ध धर्मय् तसकं तःधंगु संकट वल, मार वल । अयसां बुद्धधर्मयात थौ तक्क म्वाका तये फूगुया मू कारण हे बौद्धमार्गि समाजय बज्रयान धर्मया प्रचलन व उकिया प्रचार प्रसार खः धयागु बज्राचार्यपिनि दाबि दु । थथे भारतय् उदय जुया विकास जूगु बुद्ध धर्मया छगू कचा बज्रयान भारतय् उबलय् हे लोप जुइ धुंकल । भीथाय् बौद्धमार्गी समाजं प्रचलनय् हइच्वंगु व नालाच्वंगुथें याःगु बज्रयान धर्म विश्वया गुगुं नं देशय् खने मदया वने धुंकल । अयसां नेपालय् बज्रयानरूपि बंगलसिमां थःगु हा जक्क जमिनय् विस्तार यानाच्वंगु मखुसे सिमाया कचामचा नं न्हियान्हिथं भ्वाप्पचिना वनाच्वंगु दु । थ्व वज्रयान धर्म सम्प्रदायया नितिं जक्क मखुसे समस्त बौद्धमार्गितय् निति हे गौरवया खँ धाय्माः ।

साहित्य उपन्यास – जन्ति न्त्यात

चमि– मदन गोपाल प्रधान “क्वा:घासा”

५ न्याव्व:- २

कथं.....

पत्रिका स्वये दिना: लाइब्रेरियन भाजुं छयं थस्वकल । छुं न्हूगु खँ न्यंके त्यंम्ह थें श्रीयात स्वत । स्व:गु खंसां मखं पहलं श्री पत्रिका स्वयाचन ।

“थ्व समाचार छिं सिलला ?” श्रीया ध्यान साले पहलं लाइब्रेरियन भाजुं धाल ।

“छु थें ?”

“स्वया दिसँ ।” धका: थ:म्ह स्वया च्वंगु पत्रिका श्रीया न्त्य:ने तथा विल ।

“छिं स्वयादिइ हे धुंक्ल नि । हानं जिं छाय स्वया च्वने मा:गु । वरु न्यंका दिसँ समाचार छु ख: ।

“भौमचायात दिनदिनिं पयनं बिया छव:गु ।”

“भौमचायात दिनदिनिं पयनं बिया छव:गु ?”

“वहेला धयागु ।”

“वैय्ला मज्जला मनूत ?”

“वैय् जूगु मखु वरु सध्धे जूगुया चिं धायेमाली, जिं स्वयेवल्य ।”

“अयसा छि वैय् जुल जुइ का ।”

सफू कुथिया निस्तब्ध वातावरण भंग जुइक निम्हं हररं न्हिल । अले स्वीच तियेवं हाला: च्वंगु क्यासेट दी थें निम्हं तक्क दित । न्त्यनेसं च्वंगु पत्रिकाय् श्रीया मिखा वन ।

“स्वया दिसँ ले, पत्या: मज्जसा ।” न्त्यने च्वंगु पत्रिका धिना: श्रीयात विल । पत्या: मज्जू पहलं पत्रिका कया: श्री स्वत । धाथें लाइब्रेरियन भाजुं धा:थें हे जुया च्वन । पत्रिका स्वये धुंका: नं श्रीयात विश्वास मज्ज । विचा:यात । अले भचा लंका धाल, “मखु छिउ, छापेया:बलय् व्दंगु जुइ थ्व । म्त्याय् मचा जुइमा:गु थासय् भौमचा जू वंगु जुइ ।”

“छाय् छित: पत्या: मज्जला ?”

“जित: पत्या: जू मज्जू सिबेनं थ्व समाचार गुलित सत्य ख: धयागु जिगु विचा: । गनं थ्वग खालि पत्रिकाया लागिं जक समाचार मखुला धयाथें च्वं । छाय् धा:सा थौं कन्हय् पत्रिका चुइकेगु तरिका नं यक्वं दु ।”

“दयेफु । मदै धाये मफु । तर थ्व समाचार पत्रिकाया लागि जक समाचार मखुसे मुकं वास्तविक तथ्यय् आधारितगु खँ ख: । विचा: याना दिसँ । थ्व समाचारय् बिया छव:म्ह, बिहा या:म्ह निथ्वया नां, थाय्वाय्, तिथि मिति आदि फुक बाँलाक हे च्वया: त:गु दु ।”

“थाय् बाय्, तिथि मिति सध्धे ख:सां नांत काल्पनिक जुइफु ।”

“नां काल्पनिक ख:सा थ्व समाचारय् च्वयाच:गु त्वाल्य् च्वपिसं थ्व पत्रिका मव्वं जुइला? हानं यल तापा:गु थाय् नं मखु । उकिसनं हानं भौमचा बिया छव:म्ह यल देया नां जा:म्ह साहू ख: । वयात म्ह मस्यूपिं सायद कम हे जुइ । अज्या:म्ह साहुया नामय् ख्या:याना: पत्रिका च्वइला ? हानं पत्रिकाया नं ला थ:गु नैतिक आचार दु ।”

“अयसा व साहु छिं नं म्हस्यू?”

“यें यल, ख्वपय्, अप्व:याना सकसिनं म्ह स्यू । व छम्ह साहु जक मखु । समाज सेवक नं ख: । अयजुगुलिं नेपा: देशय् जक मखु देसँ पिने नं वया नां न्त्यने दु ।”

लाइब्रेरियन भाजुया खँ न्त्यना: व समाचार असत्य जुइगु श्री मताल । अले थयापिं समाज सेवकतय् पाखे सामाजिक क्रान्ति व्वलने फौगु

विचा:यात । न्त्यनेकनेबलय् छु थें छु थें च्वंसां मानव कल्यानया निम्तिं छगू त:धंगु पला: ख: धयाथें श्री तायेकल । मनं मनं व साहुयात सुवा: नं विल । साहुया थ्व पला:यात श्री देबत्व ज्या तायेकल । अले दु नुगर्लनिसें व साहुयात नमस्कार यात ।

नटमस्त जुया: दुनुगर्लसाहुयात नमस्कार या:म्ह श्री न्त्यने बाछाइ बाजं था:पिं अले त्यूने जन्ति व:पिनिगु दथुइ घुसुनं न्त्याना:च्वंगु कारय् थ: च्वना: पिज:या छें रिखे वना:च्वंगु खंकल । पिखा लखुइ कार दिइवं लसकुस याना श्रीयात तले थत यंकल । ह्याउँगु भूमिइ लुँ रंगया साँ पव: बुत्ता दुगु दुपत्ताया सारीं सिना: गाम्बलं त्वपुया: भम्चा जुया: च्वंम्ह पिज:या लिक्कसं फ्यतुकल । कुने चुकय् थाना: च्वंगु बाछाइ बाजंया धून मन हे सिचुक्क श्रीया न्हाय्पनय् थ्वया च्वन । त्यासिपिं व मचातय्सं इपिं निम्हेसितं दथुइ तथा: भुनाच्वन । भिडियो का:पिं, फोटो का:पिं लिमला फमला उखें थुखें जुयाच्वन । भवलाक्क क्यामर ।या मत च्यानां व:गु ज: वया मिखाय् ला:थें च्वंगुलिं श्री भसंग वन ।

न्त्यलं चा:म्ह थें जुल । बाछाइ बाजंया स:नं ताये मन्त । पिज:या थासय् लाइब्रेरियन भाजु । थ:गु मन व्व:गु पठ: खना: श्री थ:हे छक्क जुल । थ:म्ह थ:तन्तुं हिस्याये थें छक: वास्याक्क न्हिल ।

“छाय् न्हिला दिया ? छित: जिगु खँय् विश्वास मदु ला ?”

“मखु मखु । थ्व खँ मखु । अबोध मचातयगु सरल स्वभाव खना: न्हिले मास्ति व:गु । स्वया दिसँले हुँ छेंया भौप्वा:चां मचा छम्हेसिनं जिगु मिखाय् न्हाय्कं क्यना च्वंगु ।”

थुलि धया: श्रीं सफू कुथिया न्त्यनेसं च्वंगु छें पाखे पतिंचां सुया क्यन । लाइब्रेरियन भाजु मिखा व्वयेकेवं न्हाय्कं क्यना च्वंम्ह मचा लुकुविल । भौ प्वा:चा पाखे छक: स्वया: लाइब्रेरियन भाजु दिक्क चा:पहलं सुंक च्वन । लाइब्रेरियन भाजु दिक्क चा:गु खना: श्रीयात भतिचा गथखे च्वन । छाय्धा:सा मचाला थन तोहजक ख: । मचां याना: श्री न्त्यगु मखु । दोष मेपिन्त पाछायेके जक दत धा:सा लिफ: सुनानं स्वइ मखुगु जुया च्वन ।

उखे लाइब्रेरियन भाजु दिक्कसा थुखे थ:गु हे पहलं म्हाइपुका च्वंम्ह श्री पक्क जुया च्वन । अबलय् हे लाक्क हानं छक: स्वा:ने सलं दिक्क व पक्क जुया: च्वपिं निम्हं थ:थ:गु साधारण स्थितिइतुं वल । नाडी भ्यानात:गु स्वया: श्री धाल, “अहो ! न्याता:ई जुइन । लि हे वात । न्याता: ई लिपा बसय् सापहे म्व: जुइ य: । म्हाँल, थौयात वना: हे छवये । नमस्कार !”

□

हलिं नेवा: गुथि किपू कचां किपुली या:गु

“भिके-ल्ट्वने-न्हूधा: यायेनु”छयों तथा चिनाखँ गोष्ठी व्वंगु चिनाखँ छसिकथं पिकया वनेगु तातुना थ्व चिनाखँ न्त्यव्वयागु ख:

४४.भिके ल्ट्वने न्हूधा: यायेनु

प्रशान्तमहासागर

मुगलछें, किपू

जीवनया खँ

छंगु मिखां जिगु

अले

जिगु मिखां छंगु

फुक्कं

सरसर्ति स्वयेवल्य

ल्हाकेत्यंगु, ल्हाकेधुंकुगु

न्यनेकने यायेवल्य

बुखं जुइधुंकल

थौयागु हे ख:सां

म्वानाच्वनागु मानौं सीमत्यतल्ले दुगु जीवन

छयला: वयाच्वनागु खँय्

पुलांगु हे जुइधुंकल

मभिगु खँया लिच्व: जुइधुंकल

छंत न्हया: जि भत्चा तधिक: जुइ

विचा:या च्यो जुइधुंकल

उकिं

न्हूधा:कथं

जि यचुम्ह पिचुम्ह जुइत

छंगु किच:या नौनं बालाकेत बुले मखुत

थ:गु जीवनया पीडा फुक्कं लंकेत

वास:कथं छंगु हाकुगु खँ सुयात कने मखुत

मनू जुया,

जिं, उलि हे याये मफुसा

जिगु जीवनया लक्ष्य छु

जिं भिकेगु छु

जिं ल्ट्वना:

न्हूधा: हया: न्हूम्ह गथें जुयाजुइ

खँय्त ला

मनू जुया: मनूया खँ मथूपिं

थौं

छ व जि हे जुइधुंकल

छपाँय् छथी जुया:

ख्व:चा दुगु गुलिं नं खँ दु, ल्ट्वने मस:पिं नं

छ व जि हे जुइधुंकल

अथे जुया:

म्वाछिंम्वाय्कं

गनं भीपिं म्वानाच्वनागु दु कि विचा: छक: छयला:

“भिके(ल्ट्वने(न्हूधा: यायेनु” धइगु कथं

जीवन जक म्वाना: स्वयेगु ख: कि....?

नेपाल चल्य् याइपीं शासकत

गुलिबल वन

सूनानं थ्व बेरोजगार समस्या

समाधान याय्गुली च्यूता मका:

वरु पुङके बाहुनको सुकें चन्दन धाथें

चि: धँगु दे नेपालय्

सलँस: दलत: दु मदैगुनं गनं

दलया नेता जुलकी मन्त्री जुइदैगु

दलया सदस्य जुया नं

नेताया लोखा हाचाँ मगाइम्ह

सक्रिय कार्यकर्ता जुसाँ

न्त्यावलें ल्हा हुसुलुं प्वा फुसुलुं

चाकडीया परम्परागत संस्कारय्

नेवा त थौं तकनं न्त्योने मला:

थ:गु हे स्वभीभानये च्वना

वरु मुस्किल जीवन हना वया च्वंपी

थगु हे स्वाभिमानय् च्वना च्वं पीं

कवि राम महर्जन

नगाउँ, की.न.पा. ९

दे चल्य् याइम ख: शासक

गाडी चलय याइम्ह ख: चालक

गाँ शहर स्यौकिम्ह ख: दुष्ट

दे या धुकु फोरे याइम्ह ख: भ्रष्ट

स्वीड स्वकोटी घोपीं दुगु

देवभूमी नेपालय् जन्म जुया नं

थन चौपी जनतात ज्या मदया

विदेशय् च्यो भ्वातीं च्वों वने माला च्वंपीं

छित: स्थानीय नेता, उद्घोषक,
वक्ता नापं बांला:म्ह एफ एम
संचालक यायेगु

जिमिगु अभियान

छिगु नितिं मदयेकं मगा:गु

१) संचार साक्षरता

२) न्वचू कला

३) उद्घोषण

४) एफ एम संचालन



किपूया युवा

पत्रकार श्रीकृष्ण

महर्जनं च्वयादीगु

सफू

नासः

उकिया नितिं छिं सफू न्याना व्वनादिसँ । छि थ:

स्वयम हे सक्षम जुयादिसँ ।

सफूया नितिं फोन ल्या: ४३३३००७,

९८४१४०१०७७, ९८४१७५२५८३

मातृभाषा विना नेपाली भाषाया विरासत म्वाके फइमखु

शिक्षा मातृभाषां जुल धाःसा जक विद्यार्थीपिन्सं बांलाक्क व थुइक व्वने फइ



ज्वजलपा वाःपौ

भाषा आयोगया नायः लवदेव अवस्थीं मेमेगु मातृभाषाया विकास विना नेपाली भाषाया विरासत कायम जुइमफइगु खँ धयादीगु दु ।

शिक्षा पत्रकार समाज नेपालया संयोजनय् भाषा आयोगं बुधवाः पोखराय् ग्वसाः ग्वःगु ‘भाषा आयोगया ज्या, कर्तव्य व अधिकार’ सम्बन्धी अन्तरक्रिया ज्याभवलय् न्वःवानादिसँ वय्कलं नेपाली भाषाया विरासत ल्यंकातयेगु नितिं मेमेगु मातृभाषाया नं संरक्षण, सम्बर्द्धन व प्रवर्द्धन यायेत आवश्यक जूगु धयादीगु खः । नायः अवस्थीं धयादी, “सरकारी कामकाजया भाषा नेपाली खः, तर मेमेगु मातृभाषाया संरक्षण, सम्बर्द्धन व प्रवर्द्धन विना नेपाली भाषाया गुगु विरासत दु, व पू वंके फइमखु । उकिं मेमेगु मातृभाषायात नं सम्बोधन यायेगु आवश्यक जू ।”

नायः अवस्थीं मातृभाषा सम्बन्धी ज्ञानया अभाव जुयाः उगु भाषात लोपोन्मुख अवस्थाय् थ्यंगु खँ नं कनादिल । वय्कलं भाषाप्रति मोह न्ह्यवःसँ भाषाया स्तरवृद्धि यायेत आवश्यक जूगुलि वः बियादिल ।

वरिष्ठ भाषाविद् प्रा.डा. योगेन्द्र यादव भाषा लोप जुयाः वलिसे सम्बन्धित जातया संस्कृति व म्हसीका हे लोप जुइगु खतरा दूगु खँ कनादिल । वय्कलं भाषा लोप जुयाः उगु भाषा न्वःवाइगु समुदायया जीवनय् तक ह्रास वइगु दावी यानादिल । वय्कलं शिक्षा मातृभाषां जुल धाःसा जक विद्यार्थीपिन्सं बांलाक्क व थुइक व्वने फइगु खँ कनादिल । प्रा.डा. यादव नेपाया कुल १३३ भाषामध्ये ९६ प्रतिशत भाषा ४ प्रतिशत जक न्वःवाइगु व केवल ४ प्रतिशत भाषा ल्यंदनीगु ९६ प्रतिशत न्वःवाइगु तथ्यांक न्ह्यव्वयादिसँ थुकिं यानाः आपालं भाषा लोप जुइगु अवस्थाय् थ्यंगु धयादिल । वय्कलं भाषाया अभिलेखीकरण यानाः पुनर्जीवित यायेफइगु धयादिल ।

पत्रकार महासंघ कास्कीया नायः दिपेन्द्र श्रेष्ठ भाषा राजनीतिक मुद्दा जुइमफूगु खँ कनादिल । वय्कलं न्हापांगु चरणया स्थानीय तहया निर्वाचन क्वचाःसां नं छुं नं स्थानीय तहया उम्मेदवार स्थानीय तहल्य् छुं भाषायात माध्यम भाषा बाय् कामकाजी भाषाया रुपं छ्यलाबुलाय् हये धकाः धायेमफूगु हे दुःखद् जूगु टिप्पणी यानादिल ।

पश्चिमाञ्चल क्षेत्रीय शिक्षा निर्देशक विष्णुबहादुर अधिकारी सामर्थ्य विना भाषाय् समानता मालेगु याःसा दुर्घटना जुइगु ख्याचः बियादिल । वय्कलं सामर्थ्यया आधारय् भाषाय् समानता मालेत भाषा आयोगयात सुझाव बियादिल ।

स्वक्वःगु पेजथ्री पिपुल्स च्वाइस अवार्ड ११३७ घोषणा

ईलोहं प्रकाशन प्रा.लि.या ग्वसालय् स्वक्वःगु पेजथ्री पिपुल्स च्वाइस अवार्ड ११३७ घोषणा याःगु दु । शुक्रवाः सनिलय् नेपाः ब्याकेटय् जुगु छगू ज्याभवलय् पेजथ्रीया सम्पादक दर्शनवीर शाक्य उगु घोषणा यानादिगु खः । थुगु अवार्डय् नेपालभाषाया सकिपा, म्युजिक भिडीओ, अडीओ लिसँ थीथी विधात दुथ्याइगु जानकारी ब्यूगु खः लिसँ थ्व हे वइगु आमै असार १० गतेया दुने तक नां दर्ता यायेत इनाप नं याःगु दु ।

अथे हे उगु ज्याभवलय् ईलोहं प्रकाशन पाखें पिदना च्वंगु नःलि नेपालभाषा साहित्य पत्रिका १०० गू ल्याः पिदंगु लसताय् नःलिया सम्पादक नरेशवीर शाक्य नेपालभाषा साहित्य पत्रिका नःलि थन तक पिथनेत ग्वहालि यानादिपिं सकसितं सुभाय् देछानादिगु खः । ज्याभवलय् ईलोहं प्रकाशनया पाखें नेपालभाषा कयाः नेवाः हलिं नेवाः इग्लीस स्कूल व नेवाः इग्लीस स्कूल थेचव्य् व्वनीपिन्त छात्रवृत्तिया विइगु घोषणा याःगु खःसा ईलोहं प्रकाशनयात निरन्तर ग्वहालि यानाच्वंगुलि रवीन्द्र बज्राचार्ययात सम्मान याःगु खः । ज्याभवः सुशिला मर्हजन न्ह्याकादिगु खः ।



पलिस्थाया चिनाखँ मुज्या

पलिस्था चिनाखँ मुज्या ११३७ शनिवाः हिनय् यँया च्वसापासाया हलय् जुल । पलिस्थाया ३३ क्वःगु साहित्य ज्याभवः कथं उगु ज्याभवः जुगु खः । ज्याभवलय् नेपालभाषा थीथी कविपिन्सं चिनाखँ व्वना न्यंकुगु खः । ज्याभवः विष्णु चित्रकार सभापतित्वये जुगु खः ।



तपाईंको टोलमा भएका घटना कीर्तिपुरको समाचार बनाउने
हो भने तपाईं एक कल फोन गर्नुस् हामी तपाईंको टोलको
समाचार कीर्तिपुरको समाचार बनाईदिनेछौं

कीर्तिपुर सन्देश साप्ताहिक



कीर्तिपुरको चित्रण

किपुलिं पिदनाच्वंगु कीर्तिपुर सन्देश वाःपौ व ज्वज्वलपाः वाःपौया ग्राहक जुइगु नितिं स्वापू तयादिसँ

कार्यालयः निखासी टोलः कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वाःपतिइ छिगू चिनाखँ/बाखं/हाइकू विज्ञापन
व मेमेगु च्वसू पिथनेगु जूसा जिमित स्वापू तयादिसँ

सकलसिगु मंकाः सः



ज्वजलपा वाःपौ

ज्याकूः निखासी त्वाः किपू नपा-३ फोन ल्याः ४३३३००७,
९८०८६२६४२० ई-मेल : kirtipur_sandesh@live.com